


Angelo Sebastiano Barisone, *Un suve'*, Galata Edizioni, Genova 2014, pagg. 376

Quei de Rsciugni, *Gnâchi e fûrbi*, 2015 (CD)

Quelli de Rsciugni (Roscigión pe-i zeneixi e Rossiglione pe-i forèsti) peuan êse contenti d'aveighe scimili anba-sciatoî.

O primmo o se poria definî "o Proust de Rsciugni": stæto pöi mego do pâize, o l'â vosciuo contâ a vitta menûa da sò gente comme o l'â conosciua da figeu, inti anni dôppo a segunda goæra e finn-a a-o '62, quand'o l'ê intròu inte medie. In muggio d'aregòrdi de fæti e personn-e, con nommi, cognommi e fotografie, ch'o no voèiva anessan pèrschi perché chi vegniâ dôppo, amiândose inderê, o no treuve o veuo. Un libbro longo da lêze, ma quand'o finisce rincresce in pö, comme vegnî via da 'n pòsto dove se stava ben e in bonn-a conpagnâ.

I segondi en in bello gruppo muxicale ch'o deuvia a parlâ de Roscigión pe cantâ de cöse do pasòu e d'ancheu (perché i belinoi e i furbi do titolo existan de longo), mesciando con òtimi risultati a tradiçion locale con ritmi muxicali forèsti comme o *country* e o *swing*: belle e muxiche e belle e parölle, che a vòtte divèrtan e a vòtte comuevan.



Giovanni Ghione e Gianni Giusto (a cura di), *Varazze e le sue nove confraternite*, Varazze 2012, pagg. 80

A l'ê 'na publicaçion do *Campanin Russu*, asociaçion de Vâze ben ben attiva into mantegnî e fâ conosce e tradiçioin da çità. Tra queste gh'ê e neuve confraternite, nasciûe tanti secoli fa into bezeugno d'agiutâse e de

sentise unii: scicomme questo bezeugno o torna a fase sentî ancheu ascì, an pensòu de fâ questa goidda che d'ògni confraternite a conta a stöia, a describe i Cristi, e casce procescional, i vestî, e fèste, a sede e quande se peu vixitàle.

'N'invito a tutti, a-i turisti ascì, a riscrovî questo patrimònio d'arte, stöia e devoçion, inveugia e agiutâ da 'na mappa e tante belle fotografie a colori.



Monica Lanfranco (a cura di), *Valvarenna. Nonne, madri, figlie – Un matriarcato imperfetto nelle foto di fine secolo*, Microart's Edizioni, Recco 1995, pagg. 90

Luciano Venzano, *Tradizioni e gusto in Val Varenna*, Ateneo Edizioni, Genova 2015, pagg. 90

A stöia che se studia in scî libbri de scheua a conta de personaggi e de fæti gròsci, inportanti, ma derê gh'ê tutte e stöie menûe da gente ch'a l'areze in scê spalle a stöia grande: ne parla questi doî libbri in sciâ valadda a-e spalle de Pêgi.

O primmo o describe a fadiga incesante de dònne, in casa e feua, pe governâ e mandâ avanti a caza e a famiggia, e co-o sorizo, comme se vedde da-e fotografie che piggian ciù de meità do libbro.

O secondo, tiòu zù a-a spedîa pe amiscion de l'aotò, o parla do mangiâ, de tradiçioin religiose, di rimedi pe-moutîe, de bestie sarvæghe, di mestê, di zeughi, de famigge e de personalità inportanti pe quello teritòio. O nòstro prescidente o l'â scritto a presentaçion.

